

**Aatsitassanut inatsimmiittup § 45c -p allannguutissaatut inatsimmik siunnersuummik kingusinnerpaamik UPA 2017 sioqqullugu saqqummeeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni aligoqqiit (diamant), aligut aappalaartut (rubin), safir, smaragd, chrysoberyl, kiisalu opal-it §§ 45-miit 45a-mut malittarisassat malillugit katersorneqarsinnaalersillugit.**  
(Inatsisartunut ilaasortaq Peter Olsen, Inuit Ataqtigiit)

### **Akissuteqaat**

Aningaasaqarnermut Aatsitassanullu Naalakkersuisoq

### **Siullermeerneqarnera**

Nunaqavissut pinngortitami angalaarnerminni akuersissummik peqaratik aatsitassanik sorlernik katersisinnaassanersut saqqummiummagu, siunnersuuteqartoq qutsavigineqassaaq. Nunaqavissut aatsitassanik akisuunik aamma akisunnginnerusunik katersisinnaassasut Inuit Ataqtigiit Naalakkersuisunut isumaqataammata, Naalakkersuisut nuannaarutigaa.

Aatsitassanut suliaasaqarfimmi isertitaqarnissamut suliffissaqartitsinissamullu nutaanik periarfissaqalernissaa qulakkeerneqassasoq siuarsarneqassasorlu Naalakkersuisut politikkeraat, tassanilu aamma annikitsumik aatsitassarsiornermut suliaasaqarfik ilaavoq. Innuttavut ujaqqanik pinneraasiassanik suliaqarnissamut annertunerujussuarmik isumassarsisarput aammalu kinguaariiaat misilittagaqarlutik. Tamanna innuttaasunut nunaqavissunut, annikitsumik aatsitassarsiornermik suliaqarlutik ingerlatsinissamik kissaateqartunut pitsaanerusunik atugassaqartitsinikkut, eriagineqassasoq aammalu inerisaqqinneqassasoq Naalakkersuisut kissaatigaat.

2012-imi aatsitassanut ikummatissanullu inatsisip allannguuteqartinneqarnerani akuersissummik peqarani nunaqavissut inussutissarsiutigalugu katersinissamik piiaanissamillu periarfissaqalerput, taamaattoq ukiumut 100.000 koruuninik killeqartumik aammalu killilersuinertaqartumik, aatsitassat akisuut tassani ilaatinneqaratik. Taamaattoq eqqumaffigeqqussavara 2012-imiilli innuttaasut nunaqavissut kisermaassisussaataalluni annikitsumik aatsitassarsiorneqarnissamut akuersissutip ataani aatsitassanik akisuunik katersinissamut periarfissaqarsimmata. Periarfissarlu taanna amerlasuut atorsimavaat.

Inatsit inuiaqtigiinni ineriartorneq ilutigalugu ineriartortinneqassasoq Naalakkersuisut kissaatigaat. Annikitsumik aatsitassarsiornermut suliaasaqarfik maannakkut ukiuni marlussunni ingerlareermat, maleruagassat qanoq ulluinnarni atorineqassanersut qimerluussallugu naleqqulluarpoq.

Taamaattumik annikitsumik aatsitassarsiornermut inatsit, Aatsitassanut oqartussaasoq 2015-imi novembarip naalernerani annikitsumik aatsitassarsiorneq pillugu suliaqarluni ataatsimiisitsimmat,

qulequttanut ilaavoq, tassani annikitsumik aatsitassarsiornissamut pisinnaatitsissummik pigisaqartut tamarmik aamma annikitsumik aatsitassarsiornissamut soqutiginnittut qaaqusaasimallutik. Annikitsumik aatsitassarsiornissamut pisinnaatitsissummik pigisaqartut suleqatigineqarluarnerat aamma ingerlaavartumik oqaloqatigineqartarnerat Naalakkersuisut pingaartittorujussuaat. Annikitsumik aatsitassarsiornissamut pisinnaatitsissummik pigisaqartut amerlasuut suliaqarluni ataatsimiititsinermi peqataasut aammalu naliliinermut immersugassani, aqqissuussineq naammagisimaartorujussuullugu, oqaatigaat. Suliaqarluni ataatsimiititsinermi pitsanngorsaanissanut siunnersuutit aalajangersimasut saqqummiunneqarput oqallisigineqarlutillu. Ilaatigut suliaqarluni ataatsimiititsinerup taassuma kingunerisaanik, aatsitassanut ikummatissanullu inatsimmi annikitsumik aatsitassarsiornermut maleruagassat nutarterneqarnerannik suliaqarneq Naalakkersuisut aallartippaat.

Taamaattumik oqaatigisinnaagakku nuannaarutigaa, maannakkut inatsisinik allannguuteqartitsinissamut siunnersuutit suliarineqalereermata. Allannguutit ilaatigut malitsigissavaat aatsitassanik katersisinnaanerup annertunerulernera, ilanngullugit ujaqqat pinneraasiassat aamma aatsitassat akisuut, aammalu takornariat sunik Kalaallit Nunaannit annisseqqusaanersut maleruagassat ersarinnerulernerat. Naalakkersuisut inatsimmut allannguutissat taakkua 2016-imi ukiaanerani ataatsimiinnermi saqqummiutilersaarpaat.

Taamatut oqaaseqarlutik Naalakkersuisut siunnersuut akuerineqassasoq inassutigaat.